

Nai' Paulus in surat no nuan neu apirsait ein et kota Korintus 2 Korintus

Tabe ma haan buseet

¹ Surat re' ia na'ko au nai' Paulus kau. Uisneno nreek kau he au 'nao 'eu mee-mee he utoon 'eu tuaf anmatoom nok Yesus Kristus, re' Uisneno naruru' ma nakrira' nain Je na'ko unu'. Hit ori' nai' Timotius es ia msa'. In nsonu' haan tabes ma haan buseet.

Au 'tui surat re' ia 'eu apirsait ein ok-oke' re' biasa nabuan nbin kota Korintus ma propinsi Akaya.[☆] ² Au 'onen 'eu Uisneno, es re' hit Ama', ma 'eu Yesus Kristus, es re' hit Usi'. Au 'toit he Sin naruru' ma nakrira' Sin nekak arekot neu ki, maut he hi bisa mmoin nok mamut, rame' es nok es, ma tainina'.

Nai' Paulus antoit makasi neu Uisneno

³ Hai mroim he are' kanan mansian ii naikas na'rat-ratan Uisneno In kanan. Fin In re' naan, hit Usi' Yesus Kristus In Amaf. Are' rais kasian ii na'uu ma na'baa' na'ko Ne, ma In es re' anha'tain hit nekak. ⁴ In es re' anseu'saab ma nhaan mau kit oras hit tapein susat. Etun es hit bisa tseu'saab ma thaan mau tuaf'bian re' napenin susat amsa'. Fin hit bisa tha'tain sin neek ein, on re' Uisneno nha'tani nrair hit nekak amsa'. ⁵ Kristus napein susat amfa-faun neu kit. Onaim natuin Kristus annaben naan susat huma'-huma' on re' naan, etun In Amaf anha'tain hit nekak nathoe, oras hit tapein susat. ⁶ Karu hai mipein susat ambi ia, Uisneno nha'tain hai neekm ein. Ma karu hai mipein susat, rarit hai maran nok neek sabaar, hi ro he mihiin mak, Uisneno npaek ranan on re' naan amsa' he nha'tain hi neekm ein, ma nafetin ki na'ko rais maufinu. Fin karu

[☆] 1:1 Haef ein sin Reta' 18:1

hi mipein susat on re' hai, Uisneno nha'tain hi neekm ein, he hi bisa maran ma mtahan nok neek sabaar amsa'. ⁷ Es naan ate hai mpirsai mak, hi bisa mtahan ma'tani' ma ka mi'oni' fa. Fin hai mihiin mak, karu hi mipein susat on re' hai, Uisneno nha'tain hi neekm ein, ma In nha'tain hai neekm ein amsa'.

⁸ Aok-bian manekat arki! Hai roim ein ii he hi mihiin batuur anmatoom nok susat re' hai mnaben miit ee ambi propinsi Asia. Hai mnaben ate ma'fena', aneis na'ko re' hai he bisa misaah. Tar antea hai he ma'nuur, natuin hai mitenab mak, hai he mmaet een. ⁹ Hai amnaben ate, ma'fena', on re' tuaf es fe'e nneen afeek rasi nafeek hukun a'maten neu ne. Mes are' rasin naan anjarin, maut he hai mpirsai Uisneno, ma ka mpirsai fa hai tuam ein kiim. Fin Uisneno es re' anmui' kuasa he namonib nafani amates. ¹⁰ In es re' nafetin *anrair* kai na'ko maufinu, oras hai he noi mmaet. In *nroim* he nafetin kai na'ko maufinu. Ma hai mifnekan piut mak, In of nafetin kai na'ko rais maufinu *piut-piut*. ¹¹ Karu hi m'onen ma mteek kai piut, naan anturun ma nbaab kai msa', fin Uisneno nroim he nmoe' rais reko mfaun neu kai. In he nmoe' on re' naan, natuin tuaf amfaun an'oen ein ma nteek kai. Rarit oras tuaf amfaun namnau kai, sin of antotin makasi kou'-ko'u neu Ne msa'.

Nai' Paulus ansusun rencana fe'u

¹² Hai bisa mifeef a'kre'o, natuin hai mihini mbi hai neekm ein am nak, saa' re' hai mmoe' sin ambi pah-pinan ia, mituin Uisneno In romin neu kai. Hai ka mtet-koit fa na'ko mepu naan, maut he biak ein ok-oke' bisa nkius ma niit hai mmeup nok neek akninu'. Hai minaob hai mepu mpaek mahinif ma manoe^{*} re' ansaun na'ko Uisneno, ka

☆ 1:8 1 Korintus 15:32 * 1:12 Nai' Paulus in sarit anbi era' re' ia, es re' 'mahinif ma manoe^{*} re' nmoe' tuaf natenab narek-reko', he nahiin rasi natuin Uisneno In tenab'. Nok ranan naan 'mahinif ma manoe^{*} re' ia, ka na'ko fa hit tenab ma hit roenk ahaa, mes na'ko hit neek ii msa'.

mpaek fa mahinif re' na'uu ma na'baa' na'ko pah-pinan ia. Fin Uisneno naruru' ma nakrira' In nekan arekot neu kai. Es naan ate hai bisa mmeup ma'tani' ntein oras hai mibu-bua mok ki. ¹³ Au suma 'tui 'eu ki nmatoom nok rasin re' hi bisa mrees ma mihiin. Oras ia hi mihini mrair au sarit bian. Mes au ufnekan he hi bisa mihiin au sairt ii 'teme-'teme. ¹⁴ Oras ia, hi fe' mihini 'kreo' goah anmatoom nok kai. Mes oras hit Usi' Yesus Kristus ankoen On nfain neem, au 'pirsai hi of mihini mfaun. Nok ranan naan, hi bisa mifeef a'kre'o nmatoom nok kai, on re' hai mifeef a'kre'o nmatoom nok ki.

¹⁵ Natuin au 'pirsai 'ak, hi mihiin rasin re' ia ok-oke', etun unu' te, au ufeek 'iit he 'eit i'kious ki 'tein, maut he hi bisa mipein tetus no nua. ¹⁶ Onaim unu' te au utenab, karu au 'jair he 'nao 'eu propinsi Makedonia, au bisa 'eis i'kious ki. Rarit, karu au 'fain 'uum u'ko Makedonia, au bisa 'eis i'kious ki 'tein. Nok ranan naan, hi bisa mturun ma mbaab kau, he au bisa 'koon 'eu propinsi Yudea. ☆

¹⁷ Mes on mee, tua? Ansuun oras au utoon ki m'ak, au 'roim he 'eit i'kious ki, of oni' hi mak, au 'fe'-'fee'n aah ee, ai'? Ai', hi mak au suma ufeek rasi utuin au roimk ii kuuk, on re' tuaf bian anbi pah-pinan ia, oo? Ai' hi mak au atoin aputa-kriut, re' nak, "Tua." Te kaah, anbi au nekak naan ii, au utenab 'ak, "Kahaf!" Of oni' hi mak, au re' ia, on re' naan, aa oo? ¹⁸ Hit bisa tpirsai teu Uisneno, fin karu In na'uab rais jes, In ro nmoe' natuin ee. Es naan ate hai on naan amsa'. Karu hai mak, "Tua," hai ka mitenab fa mak, "Kahaf."

¹⁹ Au 'ok nai' Silas, ma nai' Timotius minoni' mrair ki nmatoom nok Yesus Kristus, Uisneno In Anah. In ka atoin aputa-kriut fa re' nak, "tua", mes in sairt ii, "kahaf". In ka na'oni' fa msa', fin karu In nak, "tua", In sairt ii batuur-batuur "tua". ☆ ²⁰ Are' kanan rasi re' Uisneno nba'an anrair sin naan, In of anmoe' sin anjarin. Es naan ate,

☆ 1:16 Haef ein sin Reta' 19:21 ☆ 1:19 Haef ein sin Reta' 18:5

karu Nai' Yesus anba'an rais jes nak, “tua,” hit bisa tataah am tak, “Batuur. On re' naan, tua! Amin!” Natu in hit tahiin tain saa' re' Nai' Yesus he nmo'e. Hai mitoon rasi ia he miruru' ma mikrira' Uisneno In pinan ma krahan. ²¹ Uisneno naan es re' anpiir naan ki ma hai msa'. In es re' nait kit atjair Iin na. In es re' anmoe' kit atmaran ma ttahan piut amsa'. ²² In es re' anfee In Asmanan he n'ator kit, naruru' ma nakrira' In reon neu kit. Naan on re' tuaf es, re' antao marak neu in baer es he natoon nak, naan iin ja.

²³ Au 'toit he Uisneno kuun es re' anjair saksii neu au uabak ia. Fin In nahiin au nekak nanan. In nahiin neu saa' am es au ka 'nao fa fe' 'eu kota Korintus. Au ka 'roim fa he 'tao umaeb ki, es naan ate, au ka 'eit fa fe' 'eu naan. ²⁴ Hai ka maikas fa hai tuam ein mjair usif he mreun ki mak, hi ro he mpirsai meu sekau. Mes hai mmeup huma' mese' mok ki, maut he hi neekm ein bisa nmarinan. Fin hi bisa maran ma mtahan ma'tani', natu in hi mpirsai meu Uisneno.

2

¹ Onaim au es re' ufeek kuuk 'ak, au ka 'eit i'kious ki fa fe', maut he tuaf amfaun ein kais neek ein ma'feen ein. ² Fin karu au 'moe' hi neekm ein ma'feen ein, sekau ntein es re' he nmoe' au neek ii nmariin? Suma hi kiim. Mes oras ia, karu au 'uum, of au ususab ki. ³ Etun es au 'tui surat neno naan 'ak, au ka 'jair fa fe' he 'eit i'kious ki. Au 'pao 'tahan fe', maut he hi m'urus main hi raisn ein fe'. Rarit, karu of a'jair he 'eit, au ka 'naben fa susat, natu in hi rasin re' naan. Fin amneon ii, hi re' naan es re' ammoe' au neek ii nmariin. Au uhiin 'ain ki arki. Onaim au 'pirsai, karu au neek ii nmariin, hi neekm ein anmarinan on naan amsa'. ⁴ Oras au 'tui surat naan 'eu ki neno naan, au 'suus ma au neek ii ma'fena'. Au 'kae 'pin-pinus amsa'. Mes au 'tui on naan, maut he hi bisa mihiin au rais manekat 'eu ki. Fin au ka 'tui fa rasi naan he ususab ki.

*Amnikan main atoni' in sanat
(1 Korintus 5:1-13)*

⁵ Anbi hi jemaat' ein naan, anmui' tuaf es, re' nmoe' too mfaun ein neek ein ansusan. Au 'suus natuin atoni' naan in a'mo'en amsa'. Te kaah, in a'mo'en naan, batuur ka ntoom kau fa ma'tani', mes naan antoom ma'tani' neu tuaf bian na'ko hi arki. ⁶ Au kais u'uab amfaun a'tein. Fin tuaf namfau na'ko ki re' mikaina' mrair je, rarit in nasnaas een. ⁷ Onaim oras ia, hi ro he mnikan main in sanat, rarit hi ro he mi'uab mirek-reko' mok ne. Fin kais-kaisa' in n'oer. ⁸ Es naan ate, au 'toit ki he mibua ok-oke' he mmoe' je he in nahiin nak, hi mneek ee.

⁹ Au 'tui surat neon goes ii, he 'uji ki. Fin au he uhiin, karu hi mmoe' re' batuur, ma mmoe' mituin are' saa' ii ok-oke' re' au uprenat sin 'eu ki. ¹⁰ Karu hi ka mitunu' fa nekaf amtein, ma mnikan main atoni' in sanat, au utuin saa' re' hi mifeek ee msa'. Karu anmui' in sanat re' au he 'nikan 'ain je te, au 'nikan 'ain atoni' naan in sanat amsa'. Au 'moe' on re' naan a'bi Kristus In human ma In matan, he njari 'tope' re' reko neu ki. ¹¹ Fin au ka 'roim fa he nitu 'naakf ee nakreo naan ki, he nasaan kit. Hit ro he tahiin in ruunt am reon amreu't ein. Onaim kais ammoon, he!

Nai' Paulus in nekan ka ntainina' fa nbi Troas

¹² Unu' te, oras au 'nao 'eu kota Troas, he unoni' tuaf anmatoom nok Kristus In Rais Reko naan, Uisneno nfei ranan neu kau 'bi nee. ¹³ Mes au neek ii ka ntainina' fa, natuin au ka uteef fa au aok-bian nai' Titus a'bi nee. Rarit au usee 'eu atoin apirsait ein, ma au 'nao 'koon 'eu propinsi Makedonia.☆

Kristus es re' anmoe' kit he tiis

¹⁴ Maski au 'bi mee-mee jah, mes au 'toit makasi kou'-ko'u 'eu Uisneno. Fin Kristus anraban anrair rais maufiun ein, rarit In niis anrair sin, ma hit tmafuut tok Ne msa'. Etun Uisneno naruru' ma nakrira' piut nak, hit re' ia, lin

☆ 2:13 Haef ein sin Reta' 20:1

na. Onaim oras hit tatoon anmatoom nok Kristus, naan nahuum on re' foo meni' re' too mfaun ein nafoi niit ee. ¹⁵⁻¹⁶ Unu' te, oras atoin Yahudis sin anmo'en fua'-turu', in masun naen ansae neu Uisneno he nharineb In nekan. Hit tahuum on re' foo mein es amsa', re' namnaub Uisneno anmatoom nok Kristus. Mes teu tuaf bian hit tahuum on re' foo puun es. Fin karu atoni' re' nmoin na'roo na'ko Uisneno ankius hit a'monik, naan anmoe' sin naten-teenb ein nak, sin of anmaten, ma sin of anbeits ok na'kon Uisneno. Mes teu tuaf bian attein, hit tahuum on re' foo mein es. Fin karu tuaf re' napein 'monit re' namneo ma namnoon, ankius hit a'monik, naan anmoe' sin namnau on mee m'es Kristus anmate nrair he nsoi nafetin sin, ma nfeen sin 'monit re' ka natfeek niit fa. Mansian mee es re' na'bei' he nmoe' rasin ia ok-oke'? Ka tiit fa, tua!

¹⁷ Mimmnau, fin hai re' ia, ka huma' mese' fa on re' atoni' bian re' nanoni' Uisneno In Kabin ma Prenat, he suma naimn ahaa upan ma pa'e, on re' sin anrakan anpaek Uisneno In Kabin ma Prenat. Kaah fa, tua! Karu hai mi'uab, too mfaun ein bisa nkius maat-maat nak, hai minoni' nok neek akninu'. Hai uab ein naan na'uuun ma na'ba'an na'kon Uisneno. Ma hai 'monim ammafuut mok Kristus.

3

Uisneno Iin na es re' nanaob Rais Manba'an Fe'u

¹ Kais mitenab mak, hai mmurai mifeef ko'uu, he mi'ratan hai tuam ein. Kaah fa, tua! Of oni' hi mitenab hai on re' atoni' bian re' anperluu he neik surat es, re' nareta' anmatoom nok sin meupk ein neu ki, na' hi mfei ranan meu hai mepu, oo? Ai' hai mperluu he mtoit surat on re' naan mi'ko ki he hai meik je meu atoni' bian? Kaah fa, tua!

² Fin hai suurt es hi mnaa' amrair je. Surat naan, es re' hi kiim. Fin hai mihiin rasi mfaun anmatoom nok hi 'monim. Rasin naan mahiki' ma matunu' nbi hai nekam. Are' tuaf amfaun bisa nresan kuuk hi 'monim; na'ko naan sin bisa nahiin hai meup gui in afan. ³ Fin nakninu' nrair nak, hi

on re' suurt es, re' Kristus antui. Rarit In nnona' ntaahn ee neu kai. Kristus ka npaek fa tinta he ntui surat naan, mes In anpaek Uisneno re' Anmoin In Asmaan Akninu'. Kristus ka nruun fa In Kabin ma Prenat anbi faut bena' amsa', nahuum on re' Uisneno nmoe' je neu nai' Musa. Mes In ntui nbi hit nekak amonit. ☆

⁴ Hai mihiin mak, hai bisa mpirsai meu Uisneno mak, rasin re' ia ok-oke' ro batuur, natuin Kristus es re' naruru' ma nakrira' nrair sin on naan. ⁵ Karu na'ko hai tuam ein aah ate, hai ka mmui' fa kuasa he mmoe' saa'-saa'. Fin kuasa ma hak re' hai mnaa' ee ji, na'uu ma na'baa' nbi Uisneno. ⁶ Uisneno re' naan, es re' nait kai mjair In ameput re' he mitoon meu tuaf anmatoom nok In Rais Manba'an Fe'u. Mes In Rais Manba'an Fe'u naan, ka nmatoom fa nok atoni' nmoe' natuin atoran huma'-huma', mes anmatoom nok atoni' anmafuit nok Uisneno In Asmaan Akninu'. Karu atoni' suma nmoe' natun-tuin ahaa atoran, naan on re' sin anmaten anbin sin neek ein, ma ka napein fa 'monit re' namneo ma namnoon, re' ka natfeek niit fa. Mes karu atoni' nmoni nmafuit nok Uisneno In Asmanan, in napein 'monit re' namneo ma namnoon. ☆

⁷ Unu' te, oras Uisneno nruun In Atoorn ein anbin faut been ein, naan ro mapina'-makraha'. Maski atoni' nmoe' natuin Atoorn ein naan ok-oke', mes sin nbeits ok fe' na'kon Uisneno. Rarit, oras nai' Musa ntoup naan Atoorn ein naan, in huumn ee anpiin ma masnaa pina' ma kraha'. Etun atoin Israelas sin ka bisa nkius niit fa in human. Mes a'roo-'roo te, pina' naan namneuk. ☆

⁸ Onaim karu re' ma'tu'i nbi fatu in mapina'-makraha' on naan, on mee nok saa' re' Uisneno In Asmaan ee ntao goe nbi hit nekak nanan? Ro tebes in he mapina'-makraha' nneis, tua. ⁹ Atoran naan naruru' ma nakrira' nak, hit

☆ 3:3 Anpoin na'kon Pah Masir 24:12, Nai' Yeremias 31:33, Nai' Yeskial 11:19, 36:26 ☆ 3:6 Nai' Yeremias 31:31 ☆ 3:7 Anpoin na'kon Pah Masir 34:29

ro he tapein hukun a'maten he tbeits ok ta'ko Uisneno, natuin hit ka tmoe' tatuin fa Atoorn ein naan ok-oke'. Maski on naan amsa', mes Atoran naan ma'tani' nabaar fe'. Mes Uisneno In Asmanan ma'tani' nneisi ntein, fin In naruru' ma nakrira' ranan he hit bisa tmarama' tfain tok Uisneno. ¹⁰ Onaim Atoran re' unu' fe'e te atoni' naan ee neu ma'tani', oras ia ka ma'tani' nneis fa goen, fin oras ia nmui' re' ma'tani' nneis. ¹¹ Atoorn ein naan sin ma'taink ein, on re' ka'o Musa in human, re' unu' te masnaa pina', rarit in piin ee namneuk. Nai' Musa ma Atoran naan ma'tani' fe', mes re' ma'tani' nneisi ntein, es re' In ma'tanin antahan piut ka natfeek niit fa, tua.

¹² Hit arkit tahiin tak, Uisneno In Rais Mamba'an Fe'u naan antahan piut, ma ka natfeek fa, tua. Es naan ate hai mi'uab maat-maat, ma ka mi'aib ee fa, tua. ¹³ Hit kais atmoe' on re' ka'o Musa. Fin in ro he nkuub in human anpaek tais, maut he atoin Israelas sin ka nkius niit ee fa karu pina' naan namneku nrair. ¹⁴ Mes Uisneno nmoe' atoin Israelas sin roenk ein anbufun. Fin tar antea oras ia msa', karu sin nresan anbin Uisneno In Suur Akninu' anmatoom nok In Rais Mamba'an Amnaa' re' naan, naan on re' tais es ankuub naan sin a'naak ein, he sin ka nneen ma natniin fa, ma ka nromin fa he nahinin. Ka nmui' fa tuaf anteni' re' bisa nfei sin neek ein he bisa nahinin. Suma Kristus anmees jah. ¹⁵ Tar antea oras ia msa', karu atoin Yahudis sin anresan saa' re' ka'o Musa antui sin, sin nnenan ma natninan, mes sin ka nahinin fa nok reko. Naan, natuin sin ka nneen anpaken fa sin neek ein, nahuum on re' saa' es antoeb naan sin neek ein.

¹⁶ Mes karu nmui' tuaf re' nmurai npirsai hit Usi' Yesus Kristus ate, Kristus anfei tuaf naan in nekan maut he in bisa nahiin batuur-batuur. Naan on re' ma'tu'i et Suur Akninu' Uisneno mnak, "In nfei nrair tais re' nkuub in human." ¹⁷ Anbi Suur Akninu' Uisneno, oras ka'o Musa na'uab am nak, "Usi'", in sairt ii Uisneno In Asmanan.

☆ 3:13 Anpoin na'kon Pah Masir 34:33-35

☆ 3:16 Anpoin na'kon Pah

Masir 34:34

Karu hit tapein Asmanaf naan, In nafetin kit. ¹⁸ Nok ranan naan, In nmoe' kit ta'ko neon goes teu neon goes hit tpiin ma takraah, on re' In. Hit kais atkuub hit huumk ein ttein. Ma hi tatenab piut anmatoom nok hit Usi' In pinan ma krahan, fin In Asmaan ee anturun kit on re' naan.

4

Baer ma'osa' re' ma'tunu' anbi 'nai konat

¹ Uisneno naruru' ma nakrira' nrair In rais kasian neu kai. Es naan ate, In nreek haefan kai he mitoon meu tuaf anmatoom nok In Rais Manba'an Fe'u. Etun es hai mtahan ma maran piut, ma ka m'oer fa. ² Onaim na'ko unu' te, hai mifeek on nai: hai mitoon maat-maat mak, hai ka mmoe' fa rais maufinu on re' atoni' bian sin. Sin nromin he nmoe' na'kor-koor ein, maut he atoni' ka bisa nkius niit sin fa. Ma sin ka namaeb ok nahinin fa msa'. Mes hai ka mroim fa he mputa-kriu tuaf. Hai ka mipoi fa anmatoom nok Uisneno In Kabin ma Prenat amsa', mes hai minoni' maat-maat saa' re' namneo ma namnoon. Nok ranan naan, too mfaun ein bisa nparikas hai uab ein anbi Uisneno In human ma In matan, rarit sin nnilei kai nak, hai re' ia, mansian humaf on re' mee? ³ Karu atoni' ka nroim fa he nahiin Uisneno In Rais Reko re' hai minoni' sin naan, sin of namre'un, fin sin anbait ok na'kon Uisneno.

⁴ Niut reu'f ein sin a'nakat naan, on re' uisneon goes re' atoni' na'besan neu na oras ia. In nmoe' tuaf bian sin roenk ein anbufun, on re' sin anforon anbin sin neek ein. Sin re' naan, tuaf ein re' ka npirsain fa neun hit Uisneno re' namneo ma namnoon. Natuin sin anforon on re' naan, etun sin ka bisa nkius niit fa Uisneno In me'u. Es naan ate, sin ka bisa nahinin fa Rais Reko re' anmatoom nok Kristus. Sin ka nahinin fa msa' anmatoom nok Kristus In pinan ma krahan. Fin Kristus naan, humaf ma masaf mese' nok Uisneno. ⁵ Hai ka mi'uab amfaun fa anmatoom nok hai tuam ein, mes hai mi'uab amfaun anmatoom nok Yesus Kristus, hit Usi'. Re' hai mi'uab anmatoom nok hai tuam ein, suma esan re' ia goah: hai mmoe' on re' ate

re' antuthae ki, natuin hai mjair Nai' Yesus Iin na. ⁶ Ununu' te, Uisneno na'uab niit am nak, “Ro he nmui' me'u re' ntana' nbi meis'okan.” Rarit In nmoe' In me'u he ntana' anbi hit nekak. Fin In nroim he nfee In me'u neu kit. Naan, in sairt ii nak, oras hit tatenab anmatoom nok Kristus, hit tamnau Uisneno In pinan ma krahan amsa'.[☆]

⁷ Maski hai re' ia, suma mansian biasa goah, mes Uisneno ntao baer ma'osa' ia nbi hai neekm ein. Naan on re' tuaf es natunu' baer ma'osa' nbi 'nai konat. Baer ma'osa' naan es re' Uisneno In me'u. Kninu' nrair nak, kuasa re' ma'tani' re' nbi kai, ka na'uu ma na'baa' fa na'ko kai, mes na'uu ma na'baa' na'ko Uisneno. ⁸ Onaim maski nbi mee-mee atoni' nmoe' nasusab kai, mes hai mtahan ma maran piut aah. Maski hai ka mihiin main fa are' kanan rasi, mes hai ka m'oer fa. ⁹ Maski tuaf anmoe' nasusab kai fani-fani, mes Uisneno ka nasaitan kai fa mmees-mees. Maski tuaf anbeson kai, mes sin ka bisa nareu' nain kai fa. ¹⁰ Natuin hai mipein imrair ha'mu'it ma susat huma'-huma', etun hai mnao meu mee-mee te, hai bisa mimnaub tuaf am mak, Nai' Yesus napein ha'mu'it ma susat amfa-faun amsa' oras In he noi nmaet. Fin, maski tuaf anbeson kai fani-fani, mes hai mmoin piut. Naan namnaub amsa' am nak, Nai' Yesus anmoin piut anbi hai tuam ein. ¹¹ Batuur, tua! Fani-fani hai amonit re' ia, he noi nmaet, natuin hai mjair Nai' Yesus Iin na. Nok ranan naan, are' kanan mansian ein bisa nahinin nak, Nai' Yesus anfee kai 'monit re' namneo ma namnoon, maski hai of ammaet. ¹² Onaim maski in a'munin naan, hai mmaet, mes hai ka mimtau fa he mi'uab anmatoom nok Kristus. Fin hai mibarab he hai mmaet on naan, maut he hi bisa mipein 'monit re' namneo ma namnoon.

¹³ Anbi Uisneno In Suur Akninu' matu'i mnak, “Natuin au 'pirsai Uisneno, es naan ate au u'uab.” Hai teenb ii huma' mese' msa'. Natuin hai mpirsai Uisneno, es naan ate hai ro he mi'uab anmatoom nok Ne.[☆] ¹⁴ Hai mihini

[☆] 4:6 Reta' Ahun-hunut 1:3 [☆] 4:13 Siit Pures-Bo'is sin 116:10

mmak, Uisneno es re' namonib nafani' hit Usi' Yesus Kristus na'ko In a'maten. In of es re' namonib nafani' kit imsa', natuin hit atmafuut tok Nai' Yesus. Uisneno of nahake' kit ok-oke' anbi In human ma In matan, he In ntoup naan kit. ¹⁵ Uisneno nmoe' rasin re' ia ok-oke' he nturun ma nbaab ki. Ansuun oras, In he nathoeb In nekan arekot amsa' neu are' tuaf-tuaf. Sin of antotin makasi kou'-ko'u neu Ne msa'. Rarit sin anmanauk ein anmatoom nok In pinan ma krahan naan.

Hit tpirsai piut teu Uisneno

¹⁶ Es naan ate, hit ttahan ma tmaran piut, ma ka t'oer fa. Maski hit aok ii namreu', mes Uisneno nha'tain hit nekak neno-neno. ¹⁷ Fin tatuin hit tenab, oras ia hit tapein susat huma'-huma'. Mes hit ro he tamnau tak, Uisneno of nait na'ratan kit. Es naan ate, hit taan saa' re' njair oras ia, ka nmui' fa upan saa'-saa'? ¹⁸ Onaim hit ro he tkius rasin re' ka mamnita' fa fe'. Kais suma tkius taan ahaa rasin re' mamniit ein aah. Fin rasin re' mamniit ein naan ka ntahan fa 'roo. Mes rasin re' ka mamniit ein fa naan, sin of esan re' ntaahn ein piut ma ka natfeek niit fa.

5

¹ Fin hit tahiin tak, hit aok re' oras ia, hit atpaek attahan atbi pah-pinan ia, on re' tenar es, re' hit tahake' ttahan. Maski hit aok ii of namreu', mes hit kais tatenab, natuin Uisneno nabarab anrair baer reok goes et sonaf neno tunan. Mansian ii ka nmoe' fa bare naan, mes Uisneno es re' anmo'e. Rarit bare naan antahan nabaar. ² Fin hit thae goen nok hit aok ii oras ia tbi pah-pinan ia. Ma hit troim he tapein ao fe'u re' of atpaek je tbi sonaf neno tunan. ³ Rarit karu hit attea nee te, naan on re' hit ka ao afa' fa, mes atpaek tai paek fe'u.* Fin hit ka suma tjair fa smanaf, mes hit tapein ao fe'u tbi nee. ⁴ Hit aok

* ^{5:3} Anmui' tuis uab Yunani re' ntui mnak, "npaek tai pake". Mes bian antui mnak, "amfei tai pake".

re' nreu' oras ia, nmoe' kit atheer asnaask ii te, mnanu', natuain atnaben ate ma'fena'. Maski on naan amsa', mes hit ka troim fa he tmaet, ma ka troim fa he tmui' aof saa'-saa' attein. Kaah fa, tua! Hit troim he tapein hit ao fe'u, maut he tasaitan ao amnaa', he nsenu' ma nseka' nok 'monit fe'u re' namneo ma namnoon. ⁵ Uisneno re' naan, es re' anmoe' kit tabarab he ttoup taan 'moin fe'u. In nfee kit imsa' In Asmanan, he njair baer tarun na'ko In Rais Manba'an naan.

⁶ Es naan ate, hit tpirsai piut. Hit tahiin tak, oras hit fe'e tbi hit aok re' oras ia, hit fe' ta'roo ta'ko Uisneno msa'. ⁷ Es naan ate, hit a'moink ii nanete npeo' hit pirsait teu Uisneno. Hit ka tmoin fa ta'ko saa' re' hit tkius ma tiit ee anbi pah-pinan ia goah. ⁸ Mes hit tpirsai tak, kar-karu hit tmaet tasaitan hit aok ii oras ia, he tnao tmoin tabu-bua tok Uisneno tbi sonaf neno tunan, hit of atmariin attein. ⁹ Maski hit tmoin piut atbi pah-pinan ia, ai' atmate tbi ia he tmoni tbi sonaf neno tunan, mes re' pentiing naan, es re' hit atharineb Uisneno In nekan. Fin re' naan, hit romik. ¹⁰ Kais amnikan. Noki-noki te, are' kanan mansian ii ro he nbaisenun n'anin Kristus. In re' naan, Afeek Rasi re' nnilei are' kanan mansian in a'monin anbi pah-pinan ia. Rarit Kristus of anbaras re' natai nok tuaf mese'-mese' in a'mo'en. Fin Kristus nahiin, karu tuaf naan anmoe' rais reko, ai' anmoe' rasi re' ka reko fa.☆

Hit bisa tmaramé' tfain tok Uisneno, natuain Kristus

¹¹ Natuain hai mimnau mak, Kristus of anparikas hai 'monim, es naan ate hai mimtau ma mhormaát Ee. Ma hai mmeup ma'tani' he mfuri' ma mkopo' tuaf he sin anpirsain neun Kristus. Uisneno nahiin nak, hai neekm ein nakniun' ein. Au 'roim he hi mihini msa' mak, hai neekm ein nakniun' ein. ¹² Hai ka maikas fa hai tuam ein ambi hi humam ma hi matam. Kaah fa, tua! Mes hai mfee 'sukif meu ki, maut he hi bisa mifeef anmatoom nok kai, ma hi kais mimaeb om. Nok ranan naan, hi bisa

☆ 5:10 Roma 14:10

mitaah tuaf ein re' nafefan. Fin sin nafefan anmatoom nok sin mepun re' atoni' bisa nkuis niit sin, te kaah sin neek ein ka nakniun' ein fa. ¹³ Karu hi maan kai mak, amaunut ate, hai mi'uab on naan nai he minaob Uisneno In mepu. Maski hi ka mihiin fa, mes Uisneno nahiin. Karu hai mi'uab ampaek tenab amneot ate, hai mi'uab on re' naan he mturun ma mbaab ki.

¹⁴ Kristus anneek niis kit. Naan es re' na'haba' kai ma nha'tain kai he minaob hai mepu. Fin hai mpirsai mak, Tuaf es, es re' Kristus, anmaet he nsenu' ma nseka' tuaf mese'-mese'. In sairt ii nak, naan on re' hit arkit ok-oke' atmaet tasaitan 'monit re' mnaa', ma ka tmui' fa hak saa'-saa' attein atbi pah-pinan ia. ¹⁵ Kristus anmaet neu hit mansian arkit mese'-mese', maut he hit arkit re' tmoni tbi pah-pinan ia, ka tmoin tatuin fa hit troimk aa kuuk attein. Mes oras ia hit ro he tmoin tatuin Kristus In romin, natuwin In nmate nrair he nsenu' ma nseka' kit, rarit In nmoni nfain.

¹⁶ Onaim anmurai oras ia, hit kais atruuk ma t'ukur atoni' tpaek mansian ii in ruku. Maski unu' te, hit atruuk ma t'ukur kuuk Kristus, atpaek mansian ii in tenab. Mes oras ia hai ka mruuk ma m'ukur mtein Je fa on re' naan. ¹⁷ Es naan ate, tuaf re' anmafuit nok Kristus anjair mansian fe'u nrair, re' nmui' 'moin fe'u. In ka on fa re' unu' naan, fin in a'monin amnaa' ee namneuk goen. Ka tiit ee fa goen! Fin oras ia, re' feu' goe nmui' nrair. ¹⁸ Are' saa' ii Uisneno es re' anmoe' sin. In es re' anmoe' rais rame' he hit tareko tfain tok Ne, natuwin Kristus annoes nain hit sanat ma penu sin. Rarit In nfee mepu neu kit imsa', he hit taruru' ma takrira' ranan amsa', maut he tuaf bian bisa nmarama' nfain nok Uisneno msa'.

¹⁹ Mimnau, fin oras Kristus anbi pah-pinan ia fe', Uisneno npaek Je he neik tuaf he nmarama' nfain nok Uisneno. Onaim In ka nsoi' fa sin saant ein antein, rarit sin ka nasaah fa sin saant ein naan sin hukun antein. Rarit

In nfee mepu neu kit, he tnao tatoon teu tuaf am tak, sin bisa nareko nfanin nok Uisneno.

²⁰ Fin hit atjair Kristus In haef. Onaim Uisneno npaek kit he teik tuaf, maut he sin nmarama' nfain nok Ne. Natuin hai mjair Kristus In haef ein, es naan ate hai mitoon ki mmak, “Uisneno namnau ma nroim he hi mmarama' mfain mok Ne.” ²¹ Kristus ka nmoe' niit fa sanat. Mes Uisneno nmoe' Je he nasaah hit sanat. Uisneno nmoe' on re' naan neu kit, natuin Kristus In a'maten anfei ranan he hit bisa tmoin tok neek amne'o, on re' Uisneno neek amne'o msa'.

6

Uisneno nmoe' rais reko neu kit

¹ Natuin hai mmeup mibu-bua mok Uisneno, hai he mfaineek ki on nai: Uisneno nathoeb ma nakrira' In nekan arekot kou'-ko'u neu ki. Onaim hi kais amtoup maan In nekan arekot naan nok ruum am parsuum aah. ² Fin anbi Suur Akninu', matu'i mnak, “Nateef nok in oras, Au 'neen ma utniin ko.

Au 'turun ma 'baab ko msa', oras Au 'soi ufetin mansian.”

Onaim amneen ma mitniin mirek-reko', joo! Oras ia, in oras arekot. Fin oras ia, Uisneno In oras he nsoi nafetin mansian.☆

³ Es naan ate, hai mroim he mpanat hai tuam ein rek-reko, he mmoin mimneo goah. Fin hai ka mroim fa he mjair ekat meu tuaf re' he neem neu Uisneno In raan a'honis. Ma hai he mi'uab namneo ma namnoon amsa', maut he tuaf kais na'uab na're'uf hai kanam arekot.

⁴ Ma are' saa'-saa' ii re' hai mmoe' sin, hai m'usaha he miruru' ma mikrira' mak, hai re' ia, Uisneno In ameup rekon. Onaim maski hai mipein susat, mipein ha'mu'it, ai' mmoni mbi taisibu, mes hai mtahan ma maran piut aah.

☆ 6:2 Nai' Yesaya 49:8

⁵ Hai mtahan ma maran piut amsa', oras an'abanat kai, oras nataam kai neu bui, oras taisibu, oras mmeup mbain aet, oras ka mtuup miit fa, ma oras mimnaah. ⁶ Hai mtahan ma maran nok neek akninu' msa'. Hai mihiin rasi mfaun anmatoom nok Uisneno. Hai mtahan ma msabaar. Hai mmoe' rais reko meu tuaf. Hai mkonan Uisneno In Asmanan he n'ator kai. Hai mneek tuaf batuur-batuur amsa', ma ka mputa-kriu fa. ⁷ Oras hai mi'uab, hai mi'uab mimneo goah, ma ka mipoi mihiin fa. Hai mtoup maan kuasa msa' mi'ko Uisneno he mmoe' rais reko. Naan on re' hai mjair sorarus, re' nnaa' kenat namtiis na'ko Uisneno, he hai mmakeen amraban musu, ma hai miis. ⁸ Hai maran ma mtahan amsa', maski atoni' naruru' ma nakrira' hormaat neu kai, ai' sin na'uab nareu' hai kaanm ein: maski sin na'uab namouf kai, ai' sin npanat hai kaanm ein; maski atoni' anputa-kriu nak, hai mipoi maan atoni', ai' sin na'uab ein am nak, hai mi'uab mimneo ma mimnoon. ⁹ Anmui' tuaf re' ka nahiin kai fa. Mes anmui' tuaf amfaun re' nahiin hai kaanm ein. Fani-fani hai he noi mmaet, mes hai mmoin piut fe'. Fani-fani sin anhukun kai ma'fena', mes hai ka mmaet fa msa'. ¹⁰ Maski hai mnaben ate ma'fena', mes hai neekm ein anmarinan piut amsa'. Maski hai ka mmui' fa roit, mes hai mimu'ib too mfaun ein anbin sin neek ein. Naan on re' hai ka mmui' fa saa'-saa', mes hai mipein are' saa' ok-oke' msa'.

¹¹ Hai mi'uab maat-maat meu ki abitan kota Korintus. Hai mneek ki batuur amsa'. ¹² Hai miruru' ma mikrira' hai manekat meu ki, ma ka mtaah-taahn ee fa. Mes hi mtaah-tahan hi manekat meu kai. ¹³ Onaim au he 'faineek 'eu ki on re' hi mjair au aanh ein. Reko nneis hi mneek kai ma kais amtahan manekat naan, tua.

Kais ammafuut mok tuaf re' ka npirsai fa Kristus

¹⁴ Kais ammafuut mok tuaf re' ka npirsai fa Kristus. Fin hi ka huma' mese' fa. Atoin apirsait re' nmoin namneo

☆ 6:5 Haef ein sin Reta' 16:23

2 Korintus 6:15 16 2 Korintus 6:18

ka natai fa nok atoni' re' nraban Uisneno, rarit ka pantas fa karu sin nmeup nabu-buan. Atoin neek reko ma atoin neek re'uf ka pantas fa he njarin partei ma nhaken ha'e mese'. Naan on re' me'u ka bisa masero' fa nok meis'okan.
¹⁵ Kristus ka bisa nekaf mese' fa nok niut ein sin a'nakat.*
On naan amsa', tuaf re' ka npirsai fa Uisneno ka napein fa sapaaf nok tuaf re' npirsai Je.

¹⁶ Hi mitenab on mee? Hi mitenab mak, hi bisa mtaam meu uim onen he mi'besan meu Uisneno fe', na' mtaam ambi uim fuat amtein he mi'bees meu baer fuat ein, ai'? Ka pantas fa, joo! Fin Uisneno naan, Uisneno amonit. In njair hit Usi' msa'. Rarit hit atjair on re' In uim onen, natuin In natua et hit nekak. Fin Uisneno ntui nbi In Suur Akninu' mnak,
"Au uim ji et Au ngguin sin atnaank ein.

Au 'poi ma 'taam a'bi sin atnaank ein amsa'.

Au he 'jair sin Uisneno.

Sin anjair Au ngguin amsa'."☆

¹⁷ Es naan ate Uisneno ntui on nai msa' am nak,
"Hi ro he mpoi mi'ko sin atnaank ein, ma mbaits om mi'ko sin,
he hi kais amjair on re' sin.

Hi neekm ein ro he nakniun' ein.

Rarit hi ro he mi'roo mi'ko are' saa'-saa' re' nmoe' hi neekm ein an'oemetan,
nok ranan naan, Au 'toup ki nok rek-reko.☆

¹⁸ Au he 'jair hi Ama';

ma hi mjair Au aanh ein amsa'.

Re' naan, hit Usi' es re' na'uab.

* 6:15 Uab Yunani nbi era' re' ia ntui nak, *Beliar*. Beliar re' naan, sin nait je na'ko uab Ibrani *Belial*. In sairt ii nak, "re' maufinu, re' ka reko fa, ka mapake' fa, niut reu'f ein sin a'nakat". ☆ 6:16 A'naak Rais Pirsait ein sin Atoran 26:11-12, Nai' Yeskial 37:26-27, 1 Korintus 3:16, 6:19, Efesus 2:21 ☆ 6:17 Nai' Yesaya 52:11

In es re' Akuaas Re'uf, tua.”✠

7

¹ Aok-bian manekat arki! Natuin Uisneno nba'an anrair rasin ia ok-oke' neu kit, es naan ate hit ro he takninu' hit nekak ma hit a'monik. Kais atkonan 'oemetan a'kre'o msa', natua namaik anbi hit tuak. Fin hit takninu' batuur-batuur ma 'teme-'teme teu Uisneno, he taruru' ma takrira' tak, hit tamtau ma thormaat Ee.

Rasi re' nharineb nai' Paulus in nekan

² Aok-bian arki! Amfee mainuan meu kai. Amfei hi neekm ein he mtoup kai nok rek-reko. Kais mi'eek hi neekm ein. Fin unu' te, oras hai mbi hi tnaanm ein, hai ka misanab miit fa meu tuaf es amsa'. Hai ka mfuli' ma mkopo' miit fa tuaf he nmo'e nsaan. Hai ka mputa-kriu miit fa tuaf he mipein upan anneis mi'ko sin. ³ Au sairt ii, au ka usaeb fa sanat 'eu ki. Fin au 'ak a'rair ki m'ak, hai mneek ki. Rarit maski on mee-on mee msa', hai mmafuut mok ki, maski hit tmaet ai' hit tmoin. ⁴ Oras ia, au ka utenab a'tein fa, fin au 'pirsai ki. Au ufeef anmatoom nok ki msa'. Hi mha'tain au neek ii msa'. Onaim maski hai mipein susat huma'-huma', mes au neek ii nmariin piut, natuin hi 'moinm ein.

⁵ Oras hai iim ambi propinsi Makedonia, hai mhae mmaet, fin hai mipein susat huma'-huma'. Hai mmatoe mok tua sona'. Anbi hai neekm ein hai mimtau msa'.✠ ⁶ Mes Uisneno es re' anha'tain tuaf re' an'oer, ma re' nnaben ate ma'fena'. Rarit In nha'tain hai neekm ein oras In nreek nai' Titus neem neu kai. ⁷ Nai' Titus in amneman naan, anha'tain hai neekm ein. Fin in natoon am nak, oras in nbi naan fe'e te, hi mha'tain in nekan. Amneen on naan ate, naan anha'tain hai neekm ein amsa'. In natoon amsa' am nak, hi mimnau ma mroim he miteef mok kau, ma hi mmei' jom batuur nok rasi re' unu' te, njari nbi hi tnaanm

✠ 6:18 2 Nai' Samuel 7:14, 1 Mape'o 'Naof Pah Isra'el ma Pah Yahuda 17:13,
Nai' Yesaya 43:6, Nai' Yereimias 31:9 ✠ 7:5 2 Korintus 2:13

ein. In natoon amsa' anmatoom nok hi maim ranan he mturun ma mbaab kau. Es naan ate, au neek ii nmariin. ☆

⁸ Au uhiin 'ak, au surat ahunut re' utoon ki 'eik uab ma'tani' naan, batuur anmoe' hi neekm ein ansusan. Mes au ka 'mei' jok fa natuin au 'tui surat naan. (Te kaah oras naan, au 'mei' jok a'kre'o, oras au uhiin 'ak, au surat naan, anmoe' hi neekm ein ansusan, maski raab ahaa.) ⁹ Mes oras ia, au neek ii nmariin. Au ka 'mariin fa natuin oras naan hi neekm ein ansusan. Kaah fa, tua! Au 'mariin, natuin oras naan, au surat anhuri' ma nkopo' ki he misnaas mi'ko hi saant ein, ma mtebi mfain meu Uisneno. Rarit hi mmanaku' hi saant ein ma misaitan hi rasin re' ka reko fa, ma mituin Uisneno In raan a'honis re' namneo ma namnoon. Fin Uisneno es re' anmoe' ki he mmei' jom on re' naan. Nok ranan naan, ka hai fa es re' ammoe' ki he mimreu'. ¹⁰ Fin karu hit tmei' jok atbi hit nekak, tatuin Uisneno In romin naan, hit tasnasab 'moe' maufinu, rarit atteib itfain tatuin raan a'honis re' namneo ma namnoon. Naan nafetin kit ta'ko Uisneno In hukuman, rarit hit ka tmoin fa tbi re' he tmei' jok piut. Mes karu hit tmei' jok atbi haa hit fefak, naan on re' atoni' pah-pinan ia sin a'moink ein, hit of tamreu'.

¹¹ Hi mitenab miit! Oras hi mrees au surat naan, au uhiin 'ak, hi mmei' jom amsa'. Naan natuin Uisneno In romin. Fin rasi naan anmoe' ki mmeup ma'tani' he hi mnoes main rais maufinu mi'ko hi 'monim. Hi mhae msa' mok hi maufinun. Hi mimtau msa' am mak, kais-kaisa' hi mmoe' maufinu mtein. Hi mimnau ma mroim he miteef mok kau, ma mibarab piut he mmoe' rais reko. Hi mibarab amsa' he mhukun tuaf re' nmo'e nsaan. Natuin hi mmoe' batuur on naan, es naan ate hi mikninu'. Nok ranan naan, ka tiit fa tuaf es he nasahab ki sanat. ¹² Onaim au ka 'tui fa au surat ahunut naan, 'eu tuaf re' anmoe' maufinu. Au ka 'tui fa msa' 'eu tuaf re' napein tuaf naan in maufinu. Mes au 'tui surat naan 'eu ki, maut he au ururu' ma ukrira' 'ak,

☆ 7:7 2 Korintus 2:5

hi uab ein ambi Uisneno In human ma In matan naan, ro tebes. Ma hi mmui' manekat batuur meu kai. ¹³ Are' saa' ein re' ia, anha'tain au nekak.

Hi mha'tain nai' Titus in nekan amsa', maut he in nekan naan bisa ntainina'. Naan anharineb antein hai neekm ein amsa'. ¹⁴ Au 'aikas 'iit ki a'bi nai' Titus, oras hai mireta' anmatoom nok hi 'mo'em arekot. Au utoon ee amsa' 'ak, hi ka mimaeb miit kau fa. Fin are' rasin re' hai mitoon miit ki sin re' naan, ro batuur. Rarit are' rasin re' hai mireta' miit sin ambi nai' Titus naan re' anmatoom nok ki naan, ro batuur amsa'. ¹⁵ Onaim ansuun oras in namnau hi 'moe'm ein, ma hi uab ein, in maneekn ee neu ki na'baab on piut. Ma in namnau msa' oras in neit anbi naan, hi mtoup goe meik rais hormaat, mes hi mitenab nok au suurt aan amsa'. ¹⁶ Au neek ii nmariin, natuin au bisa 'pirsai ki 'bi are' kanan rasi. Onaim au ka 'mui' fa tenab 'eu ki 'tein' een.

8

Sin nfeen noni-roit nok neek akninu'

¹ Aok-bian manekat arki! Hai roim ein he hi mihiin Uisneno In nekan arekot, re' In naruru' ma nakrira' nrair Je neu jemaat' ein propinsi Makedonia sin. ² Fin maski sin napenin susat amfa-faun, mes sin neek ein anmarinan piut. Es naan ate, maski sin anma'mu'in kuuk, mes sin nfeen roit amfa-faun nok neek akninu' fe', he nturun ma nbaab atoin apirsait bian re' napenin susat. ³ Au bisa utoon kuuk 'ak, sin nfeen are' saa' ii re' sin bisa nfee sin. Rarit sin nfeen ntein' ein anneis na'ko naan. Ka tiit fa tuaf es, re' na'seke' sin on naan. ⁴ Sin es re' ntotin kuuk nok neek akbubu', maut he hai mfei ranan meu sin. Nok ranan naan, sin bisa nturun ma nbaab atoin apirsait ein re' napein susat anbin Yerusalem, nahuum on re' tuaf bian antuurn ein amsa'.[☆] ⁵ Unu' te, hai mharap ma mifnekan he sin nmo'en on nai, mes re' sin nmoe' je naan, nneis

☆ 8:4 Roma 15:26

na'ko re' hai mharap ma mifneek! Ahunut, sin nnona' sin tuak ein neu hit Usi'. Rarit sin na'uab antein' ein am nak, "Hai he mnona' hai tuam ein he mtuthae ki, natuin re' naan natuin Uisneno In romin."

⁶ Natuin jemaa't ein Makedonia sin a'tope' on re' naan, es naan ate hai mtoit he nai' Titus anfain neem antein neu ki abitan Korintus, maut he hi bisa mturun ma mbaab Uisneno Iin na, re' napenin susat anbin Yerusalem amsa'. Fin unu' te, in es re' nmurai nabuab roit neu sin. Rarit oras ia hai mtoit he in bisa nanokab hi mepu he mturun tuaf.☆

⁷ Hi mepu meu Uisneno ro reko. On re': hi rais pirsait naheer ma na'kii'; hi uab ein, reko; hi mihiin amfaun anmatoom nok Uisneno; rasi re' na'haba' ki jan ma'tani'; ma hi mneek miis kai. Es naan ate, au 'roim he hi mturun ma mbaab meik roit kou'-ko'u meu Uisneno Iin na re' napenin susat.

⁸ Au ka uprenat ki fa, hi abitan Korintus, he mfee roit kou'-ko'u, mes au he 'soba' ki. Fin jemaa't ein Makedonia sin he nturun ma nbaab sin. Onaim nok ranan naan hi bisa miruru' ma mikrira' hi mmaneek batuur-batuur meu tuaf asuust ein. ⁹ Fin hi mihiin mak, hit Usi' Yesus Kristus naruru' In nekan arekot neu ki. Unu' te, In on re' atoin amu'it. Mes In nafeek he njair atoin ama'mu'it he nturun ki, maut he hi bisa mjair amu'it ambi rasi mfaun.

¹⁰ Toon es ii, hi mmurai mibuab roit meu sin. Hi ka mfee fa roit ahaa, mes hi mturun ma mbaab mi'ko hi neekm ein amsa'. Onaim natuin au te, hi ro he mmoe' on nai: ¹¹ Unu' te, hi mroim he mturun ma mbaab Uisneno Iin na re' napenin susat anbin Yerusalem. Onaim oras ia, amfee main sin oke', saa' re' hi mifeek amrair he mturun ma mbaab sin. Ma hi mi'bei' fauk ate, amfee sin nai. Mes re' pentiing, amfee sin nok neek marine. ¹² Fin karu hit tfee sin nok neek marine tatuin hit a'be'ik, naan reko msa'. Tatuin hit manoek aa kuuk. Fin tuaf kais anfee nok a'seke', saa' re' of nasuusb ee.

☆ 8:6 Nai' Titus 2:14

¹³ Au sairt ii ka nmoe' ki fa he mnaben ma'fena', maut he tuaf bian nnaben ma'kafa'. Fin au sairt ii, hit arkit tasaah ma tbau kuuk sin susat ok-oke'. ¹⁴ Fin oras ia, hi mmu'i mneis, ma sin a'mui'k ein ankurun. Noki-noki te, sin bisa nbaras neu ki msa', karu hi a'mui'm ein ankuurn ein. Nok ranan naan, hit arkit bisa tasaah ma tbau tabubua. ¹⁵ Naan on re' Uisneno In Suur Akninu' matu'i mnak, "Tuaf re' napenin ko'u ma mfaun,

ka napeni nneis fa na'ko saa' re' sin nperluu sin.
Ma tuaf re' napein ba-baun am akre'o,
ka nkuran ma nrabu' fa na'ko saa' re' sin nperluu sin."☆

Anmatoom nok nai' Titus, ma tuafbian re' he neik ook-soun ein

¹⁶ Au 'toit makasi 'eu Uisneno, natuin In es re' anhuri nai' Titus he nturun ma nbaab ki, nahuum on re' au he 'turun ma 'baab ki. ¹⁷ Batuur hai mtoit je he neiti nkus ki. Te kaah, naan in roimn aa kuun amsa'. Es naan ate in es re' he neiti nturun ma nbaab ki, ka natuin fa au haan totis. ¹⁸ Mes in ka nmees neit fa. Fin hai mreek haef amsa' mi'ko hai aom-bian tuaf es he neit nok ne. Are' jemaat' ein abitan ia nahiin tuaf naan, natuin in nmeup ma'tani' he natoon neu tuaf anmatoom nok Uisneno In Rais Reko. ¹⁹ Jemaat' ein sin a'naakt ein anpiir naan ee msa', he nnao nabua nok kai, he nturun ma nbaab kai anbi hai meup arekot ia. Hai minaob mepu ia, he miruru' ma mikrira' hai Usi' In pinan ma krahan, ma mmoe' reko meu atoin asuust ein abitan Yerusalem.

²⁰ Hai maim ranan he mmoe' rasi re' batuur, maut he ka tiit fa tuaf re' bisa nakuu kai nak, hai ka mmeup fa batuur oras hai meik roit ein ia meu tuaf ein re' anperluu sin. ²¹ Fin hai mitenab mirek-reko' he mmoe' rasi re' batuur, mi'ko neek akninu' anbi Uisneno In human ma In matan, ma nbi atoni' in human ma in matan amsa'.☆

²² Anmui' tuaf es anteni' re' hai mreek haefn ee he nnao nabu-bua nok nai' Titus sin, he nnao naat roit ein naan. Fani-fani hai mparikas maan ee goen. Rarit hai mihiin amrair mak, in nroim he nmeup ma'tani' neu ki. In neekn ee nmariin on naan, natuin in nahiin anrair nak, hi mmoe' rasi re' batuur.

²³ Karu nmui' tuaf nataan anmatoom nok nai' Titus, mitoon am mak, nai' Titus naan, au aok-bian re' anmeup nok kau piut neu ki. Atoin apirsait anbi baer sona' msa' anpiir naan sin tuaf ein, he sin nok naat roit ein ia neun Yerusalem amsa'. Sin nabua nrarin he neitin. Nai' Titus nabu-bua nok sin. Sin arsin of naruru' ma nakrira' Kristus In pinan ma krahan on re' naan. ²⁴ Onaim hi ro he miruru' ma mikrira' hi manekat meu tuaf ein re' neit naat roit ein naan. Ma miruru' sin imsa', nansaa' am es hai mroim he mifeef anmatoom nok ki. Nok ranan naan, apirsait ein na'kon jemaat' ein anbi mee-mee nahinin batuur am nak, hi mneek sin.

9

Roit turun-babat neu atoni' Kristen abitan Yerusalem

¹ Amneon ii, au ka 'tui 'tein fa he 'toit he hi mturun Uisneno In apirsait ein. ² Fin au uhiin a'rair 'ak, hi mmui' neek marine he mturun tuaf on naan. Au 'romi msa' he utoon 'eu apirsait ein abitan Makedonia anmatoom nok hi nekam arekot. Au utoon am 'ak, hi abit propinsi Akaya mibarab amrair mi'ko toon es ii, he msonu' hi roit turun-babat. Au utoon anmatoom nok hi neek marine msa' re' nmoe' tuaf bian anromin he nturun ma nbaab atoin asuust ein. ³ Rarit au 'reek haef hit aok-bian sin, he naruru' ma nakrira' mnak, saa' re' hai mitoon ee anmatoom nok ki naan, ka rais poi fa. Au utoon on naan, maut he hi mibarab main. ⁴ Fin karu nmui' atoni' Makedonias neem nabu-bua nok kau, rarit hi ka mibarab fa fe'e te, hit arkit tamaeb ok. Kais-kaisa' au rais pirsait 'eu ki, ka nmui' fa 'sukif. ⁵ Es naan ate, au utenab 'ak,

reko nneis hit aok-bian sin annaon nahunun fe' neu ki, he hi arki bisa m'ator roit turun-baban naan natuin hi rais manba'an unu' naan. Hi ro he mfee mi'ko hi nekam arekot. Kais mipain.

⁶ In a'suikn ii on nai: "Atoni' re' suma nseen fini kreo' goah, of napein sekit ma mnonut kreo' goah msa'. Atoni' re' nseen fini mfaun ma nathoeb sin, of napein nafani sekit ma mnonut ma tetus kou'-ko'u msa'." ⁷ Es-es ate ro he nafeek kuun, in he nfee fauk. Kais amfee meik neek ao-biaf. Kais amfee natuin atoni' na'seke' ko. Fin Uisneno nneek tuaf re' anfee neik in nekan amrinat. ⁸ Uisneno na'bei' he nfee ki are' kanan tetus-athoen. In na'bei' he nfee ki msa' nneis-neis, maut he hi kais amkuran saa' es amsa'. Fin karu hi mperлуу saa' es, hi of mipeni nneis na'ko hi perлуut naan. Nok ranan naan, hi bisa mfee mi'ko saa' re' anneis anbi ki, he mturun ma mbaab are' kanan meup arekot. ⁹ Anbi Suur Akninu' Uisneno matu'i mnak, "Uisneno nroim he nfee neu atoin ama'mui't ein, na'ko In nekan arekot.

In nmoe' rais amneot ma amnonot piut,

fin In nekan amneot ma amnonot naan, antahan piut."☆

¹⁰ Uisneno es re' anfee fini, he atoin tani sin ansenan. Uisneno es anfee mnahat, he hit tbukae. Uisneno re' naan, of es re' nfee ki tetus-athoen, maut he hi bisa mmoe' rais amneot ma amnonot. Naan on re' hi mjair atoin tani, rarit Uisneno nfee ki fini he hi mseen. Ma hi sekit am mnonut, In nmoe' sin na'baab ok piut neno-neno.☆ ¹¹ Fin Uisneno he nfee ki nneis na'ko saa' re' hi mperлуу kiim sin, maut he hi bisa mturun ma mbaab tuaf bian sin mi'ko hi nekam arekot. Onaim karu hi mturun ma mbaab amrair tuaf bian on re' naan, sin of antotin makasi neun Uisneno. ¹² Fin roit turun-baban re' hi mfee sin meu Uisneno lin na, ro tebes naan of anturun ma nbaab sin. Ma naan amsa' anmoe' ki he mtoit makasi meu Uisneno. ¹³ Fin oras hi

☆ 9:9 Siit Pures-Bo'is sin 112:9 ☆ 9:10 Nai' Yesaya 55:10

mturun ma mbaab tuaf bian sin, naan naruru' ma nakrira' bukti mnak, hi mpirsai batuur-batuur. Naan nmoe' tuaf bian naikas ma npures Uisneno msa'. Fin sin bisa nkius nitan nak, hi rais pirsait meu Kristus In Rais Reko naan, ka rais poi fa. Naan, natuin hi mmoe' mituin hi rais pirsait. Rarit oras hi mfee turun-baban mi'ko hi nekam arekot meu sin ma meu tuaf bian amsa' ate, naan es re' anmoe' sin naikas ma npures Uisneno.

¹⁴ Tuaf re' ntoup naan turun-baban na'ko ki, sin of an'oen ein ma nteek ki. Sin nromin ma nmarinan he nateef nok ki, natuin Uisneno naruru' ma nakrira' anrair In nekan arekot kou'-ko'u neu ki. ¹⁵ Mes Uisneno nfee nrair ki ook-soun es, re' reok re'uf nok ruum am parsuum. Ook-sonu' re' naan, es re' Nai' Yesus! In osan, nneis na'ko are' saa'-saa' ii! Es naan ate, hit arkit atbaiseun Uisneno mtak, "Makasi, tua!"

10

Nai' Paulus namneob in tuan anmatoom nok in mepu neu Kristus

¹ Au nai' Paulus kau, tua. Au es re' a'tui 'bi ia. Of anmui' tuaf na'ko ki re' mitenab on nai: karu au ubua 'ok ki, au umaeb ok he u'uab maat-maat. Mes karu au u'roo u'ko ki, au ubrain he u'uab ka u'aib fa, tua. On naan, aa oo? Te kaah, au 'toit he hi mneen ma mitniin kau, natuin Kristus In nekan arekot neu ki, ma In neekn ee ma'nura' neu ki. ² Mes anmui' tuaf bian na'ko ki re' ka mroim fa he mitniin kau. Sin na'uab ein am nak, hai 'moe'm ein on re' tua sona' na'ko pah-pinan ia sin a'moe'k ein amsa'. Onaim karu au 'eit 'eu bare naan, of oni' au ro he u'uab 'eu sin ma ka u'aib sin fa. Etun au utoon 'ain ki ok-oke', maut he au 'eit i'bi naan ate, au kais u'uab ma'tani' 'eu sin. ³ Maski hit mansian biasa goah, mes karu hit tmatoe tok tuaf bian, hit kais athaek ma'tani' he tmatoe on re' atoni' abit pah-pinan ia re' ka nahiin fa Uisneno. ⁴ Fin karu hit tmatoe tok tuaf bian, kais amnikan mak, hit suni'-kenat ka huma'

mese' fa tok abitan pah-pinan ia. Rarit karu hit tmatoe tok a'naak fatus re' anmatoe nok kit, hit tmui' Uisneno In kuasa re' bisa nareu' niis atoni' in a'sukin. ⁵ Uisneno In kuasa bisa nareu' a'sukif re' nraban Uisneno, ma nmoe' atoni' ka nroim fa he nahiin Je. In kuasa bisa naruru' ma nakrira' ranan amsa', he nsenu' ma nseka' hit tenab amnaa' nok tenab fe'u. Nok ranan naan, hit tanoni' he tatenab tatuin Kristus In nonin. ⁶ Tuaf amfaun na'ko ki nmurai nneen ma natninan neun Kristus, ma nmoe' natu'in In romin a'teme-'teme. Mes anmui' tuaf bian na'ko ki re' ka nromin fa he nneen ma natniin Ee. Onaim hai mibarab amrair he mhukun sin, re' ka nromin fa he nneen ma natniin Ee.

⁷ Hi mroim he mkius kiim saa' re' mamnita' mbi 'pohon. Mes hi ro he mkius atoni' in nekan. Onaim karu nmui' tuaf re' naan in tuan ee njair Kristus In haef, mimnau mirek-reko'. Fin hai Kristus In haef ein, on re' in imsa'. ⁸ Of oni' hi mitenab mak, au ufeef a'neis-neis anmatoom nok kuasa re' hit Usi' nfee je neu kai. On re' naan, ai'? Kaah fa, tual! Fin kuasa naan et naa, he nfee ki 'be'if, ma ka nareu' ki fa. Onaim au ka 'konan fa tuaf he namaeb kau natu'in sin nareu' au mepu. ⁹ Au ka 'mui' fa sarit he aka'tau ki 'eik au suurt ein. ¹⁰ Mes atoin ein naan na'uab ein am nak, "Kais amfairoir ma mtoe mitu'in nai' Paulus. Fin maski in suurt ee ma'tani', mes karu in nmees neem ate, in a'oret ma in uab ee ka nmui' fa kuasa." ¹¹ Maut he tuaf re' napoi on naan natenab rasi ia: saa' re' hai mtui mbi surat mi'ko bare 'roo, huma' mese' on re' hai iim ma mi'uab ambi hi sonam ma hi tnanam.

¹² Tuaf ein re' naan amsa', anromin he naikas sin tuak ein kuuk am nak, sin re' naan, Kristus In haef ein re' ma'tain ein. Hai ka mibrain fa he mitaiba' hai tuam ein mok sin. Mihiin main, joo? Fin hai ka neu fa he mma'tani mneis on re' sin, tua! Tuaf humaf on re' naan, suma nam-nami haa tuaf on re' sin jah. Rarit sin matuurn ein es nok es, natu'in sin huma' mese'. Amoont ein! ¹³ Te kaah,

☆ 10:5 Roma 12:2

hai ka mifeef kiim fa karu ka tiit fa 'sukif. Hai mi'uab on ahaa re' naan, anmatoom nok mepu re' Uisneno nfee je neu kai. Saa' re' hai mmoe' je meu ki re' naan, mituin saa' re' Uisneno nreun kai. Fin hai ka mmeup fa meup sona'. ¹⁴ Amneon ii, hai ka mi'uab amneis-neis fa oras hai mifeef anmatoom nok ki. Fin hai es re' iim he mitoon meu ki anmatoom nok Kristus In Rais Reko. Hi mtoup hai uab ein amsa'. Karu Uisneno ka nreek haefan niit kai fa, mes hai mifeef anmatoom nok ki, naan es re' ka batuur fa. ¹⁵ Karu tuaf bian es anmepun, hai ka mifeef fa mmak, naan natuin hai es ammepu. Fin re' pentiing neu kai, es re' hi rais pirsait aan na'kii' antein. Nok ranan naan, hai suus-haet re' hai mmeup meu ki mi'ko unu' naan, na'baab on piut. ¹⁶ Rarit hai bisa mnao mkoon ma mitoon anmatoom nok Kristus In Rais Reko meu bare-bare re' et hi pah naan in aon-bian re' ka tiit fa tuaf fa fe' anmeup et naan. Nok ranan naan, hit ka tmapa'autun fa tok atoni' bian re' nanaob in mepu nahuun anbi bare naan.

¹⁷ Fin anbi Uisneno In Suur Akninu' matu'i mnak, "Karu nmui' tuaf re' he nafeef, maut he in na'uab anmatoom nok hit Usi'." ¹⁸ Karu tuaf es nafeef anmatoom nok in tuan, naan ka ma'osa' fa. Mes karu hit Usi' es re' naikas tuaf naan ate, re' naan, ro ma'tani'!

11

Kristus In haef re' batuur, ma haef ein re' ka batuur fa

¹ Au he u'uab fare' kre'o. Onaim amneen mirek-reko' kau fe'. On nai: ² Au on re' hi ama'. Hi on re' au aan feto ao-'temef re' anmanaa' anrair nok atoin es. Re' nahuumb on on re' atoni' anmanaa' nok ki naan, es re' Kristus. Rarit au he 'panat ki urek-reko', maut he oras hi matsao mok atoni' naan, hi mikninu' fe'. Onaim au 'panat urek-reko' ki he kais anmui' tuaf noik ki, he nareu' hi rais pirsait. ³ Oras ia hi mituin Kristus In raan amneot ma amnonot

☆ 10:17 Nai' Yerebias 9:24

nok neek akninu'. Mes au utiun gok, kais-kaisa' te nmui' tuaf re' napoi naan ki, he hi mbeon om mi'ko ranan naan, on re' kauna' re' napoi naan bi Hawa oras ahunut. Kauna' naan bisa napoi on re' naan, natuin in re' naan, puta-kriut ee in tuan! ☆ 4 Ansuun oras tuaf human on re' naan sin neman neun ki, rarit nanoni' ki anmatoom nok Nai' Yesus huma' teta', re' ka huma' mese' fa on re' Nai' Yesus re' hai minoni' meu ki naan ate, nansaa' am es hi mpirsai tuaf on re' naan? Unu' te, hi mfei hi neekm ein he mtoup Uisneno In Asmaan Akninu' he In n'ator ki. Onaim oras ia nansaa' am es hi he mtoup smanaf huma' teta' mtein? Unu' te, hi mpirsai Kristus In Rais Reko re' hai mitoon Ee meu ki. Onaim oras ia nansaa' am es hi mpirsai meu noni' huma' teta' mtein?

5 Sin naikas na'ratan sin tuak ein nak, sin re' naan, Uisneno In haef ein re' ma'tani' nneis. Of oni' sin hak ee anneis na'ko kau, oo? Kaah fa, tua! Au ka utuin fa tenab on naan. 6 Maski nak, au ka 'paek fa ahiint ein sin uab ein, mes au uhiin batuur-batuur saa' re' au u'uab. Hi mihiin amrair rasin re' ia, natuin au ukrira' ufan-fain sin 'eu ki.

7 Oras au unoni' Uisneno In Rais Reko 'eu ki, au ka 'toit fa he hi misaah ma mitaah kau. Au 'moe' au tuak ii tua a'baut, maut he au bisa 'aikas u'ratan ki. Of oni' hi he misaan kau natuin rasi naan, aa oo? 8 Fin apirsait ein na'kon jemaat ein bare bian sin es re' nasaah ma nataah kau, ma maut he au bisa 'tuthae ki. Naan on re' au 'ait u'ko sin, he bisa 'turun ma 'baab ki. 9 Oras au ubua 'ok ki fe', rarit au 'mui' perluut ate, au ka 'oik ki fa, ai' a'toit saa'-saa' u'ko ki. Hit aok-bian sin re' neman na'kon propinsi Makedonia, sin es anturun kau. Mes au ka usaeb ki fa ma'fena' saa'-saa', ma au ka 'roim fa he noka'-nmeu te on naan amsa'. ☆ 10 Kristus In Kabin ma Prenat sin naan, ro batuur. Au uhiin amsa' 'ak, au uab ein batuur amsa', natuin au 'mafuut 'ok Kristus. Ka tiit fa tuaf es anbi

☆ 11:3 Reta' Ahun-hunut 3:1-5,13 ☆ 11:9 Filipi 4:15-18

propinsi Akaya re' bisa nafreu au fefak, ma ntaar kau he kais u'uab am 'ak, au ka usaeb fa ma'fena' 'eu ki on naan. ¹¹ Nansaa' am es au u'uab on nai? Of oni' natuin au ka 'neek ki fa, oo? Maski hi mitenab on naan, mes Uisneno kuun nahiin au manekat 'eu ki.

¹² Rasi re' au 'moe' 'iit sin, au he 'moe' sin piut. Nok ranan naan, tuaf re' nroim he naikas ma na'ratan in tuan ee he nafeef am nak, sin a'moe'k ein on re' hai, sin re' naan ka nmui' in fa 'sukif antein. ¹³ Sin na'uab ein am nak, Uisneno es anreek haefan sin. Sin re' naan, ameput re' nromin he napoi tuaf! Sin nsoob ein he nmoe' jok on re' Kristus In haef ein re' amneot ma amnonot. Te kaah are' rasin naan poi oke', tua! ¹⁴ Hi kais ammasauh, joo! Fin niut reu'f ein sin a'naakt ee msa', nsoba' he nmoe' jon on re' Uisneno In ameput sonaf neno tunan re' neik meu'-sine' nok neek arekot. ¹⁵ Es naan ate, hi kais ammasauh karu in ameupt ein amsa' he nsoob ein he nmoe' jok on re' tuaf re' anmeup nok neek amneot am amnonot. Mes ampaant om, fin Uisneno of anbaras sin maufiunk ein naan.

Kristus In haefre' batuur, nasaah susat ma ha'mu'it huma'-huma' oras sin natoon anmatoom nok Usif Yesus

¹⁶ Karu hi mromi te, maut he au u'uab fare' kre'o 'tein. Fin au he ufeef akre'o. ¹⁷ Re' au 'tui je oras ia he au 'aikas au tuak ii on re' ia ji, uab faer ahaa. Fin au uab ein re' ia, ka na'uu ma na'baa' fa nbi hit Usi'. ¹⁸ Anmui' tuaf amfaun re' nafeef natuin mansian abit pah-pinan ia sin amneik ein. Onaim au ufeef amsa' utuin sin. ¹⁹ Fin hi re' maan hi tuam ein atoin ahinit ma amanoet, karu miteef mok tuaf amonot es ate, hi mkoon ee nok neek mainuan, ai'? ²⁰ Karu tuaf bian nmoe' saa'-saa' neu ki te, hi mkonan sin on naan? Tait i'tope' on re': karu nmui' tuaf na'aet ki, hi mkonan sin on naan? Karu nmui' tuaf nabaak naan hi baer' ein, hi mkonan sin on naan? Karu nmui' tuaf napoi naan ki te, hi mkonan sin on naan? Karu nmui' tuaf naikas in tuan ee on re' kaes ko'u, ma nkana'paar ki on re' atoin

a'baut ate, hi mkonan sin on naan? On naan amsa', karu nmui' tuaf anpaas ki te, hi mkonan sin on naan? ²¹ Mes kais mitoo', tua! Fin au umaeb ok, natuin hai ka mi'bei' fa, tua. Fin hai ka bisa mmoe' fa on naan, nahuum on re' tuaf ein naan anmo'en nrarin neun ki.

Mes karu sin nafefan anmatoom nok saa' ate, au ubrani msa' he ufeef on naan. (Mes kais amnikan, fin au u'uab fare'!) ²² Sin atoin Ibranis batuur-batuur, aa oo? Tua! Fin au msa'. Sin atoin Israelas, aa oo? Tua! Fin au msa'. Sin re' naan, ka'o Abraham in sufan-ka'un, aa oo? Tua! Fin au msa'. ²³ Sin re' naan, Kristus In ameupt ein, aa oo? Tua! Fin Au msa' on naan. (Kais amnikan, fin au u'uab uab fare' es re' ia!) Batuur au 'ak, au on re' sin. Te kaah, au re' ia a'neis u'ko sin. Fin au 'meup ma'tani' a'neis u'ko sin. Fani-fani tuaf nataam kau 'eu bui a'neis u'ko sin. Fani-fani sin nbeos kau a'neis u'ko sin. Fani-fani au he noi 'mate msa' a'neis u'ko sin. ²⁴ Fin anbi au atoin Yahudis sin kuuk, sin nbeos kau npaken a'kauboe no niim. Ansuun oras sin nbeos kau npaken a'kauboe sin nbeos nafan-fain kau tar antea no bo' tenu mseo. ²⁵ Sin nbeos kau nok hau no teun. Neot es, sin npoir kau nok fatu he na'maet kau. Anfain no teun, au bnao oe je he nreem. Au utboe 'bi tais je fai jes am neon goes. ²⁶ Fani-fani au 'nao 'eu bare' 'roo 'bi mee-mee. Are' kanan siraak he nsirakab niis kau. Tait i'tope' on re': noe sako' nbi noe ko'u, abaakt ein, au atoin Yahudis sin, atoni' ka Yahudis sin fa, ma atoni' re' nmoe' jok on re' aok-bian apirsait ein, te kaah sin napoin. Au he noi 'mate msa' 'bi tais je tnanan, 'bi kota nanan, ma 'bi baer ruman re' na'roo na'ko kuan. ²⁷ Au 'mepu 'bain 'aetn ok, ma au upein kuuk susat huma'-huma'. Fani-fani au ka 'tuup 'iit fa. Au umnaah ma 'meno msa'. Fani-fani au ka 'iit fa he 'uah, au ka 'iit fa pake, ma au 'maniki 'maet.

☆ 11:23 Haef ein sin Reta' 16:23 ☆ 11:24 Surat re' Nareta' Nafani' Raan A'honis 25:3 ☆ 11:25 Haef ein sin Reta' 16:22, 14:19 ☆ 11:26 Haef ein sin Reta' 9:23, 14:5

²⁸ Karu ka mroim fa he msoi' rasin naan ok-oke' te, msoi' on ahaa ia: fin neno-neno te au on re' umaun, natuin au utenab anmatoom nok hit aok-bian apirsait ein etan mee-mee. ²⁹ Karu nmui' tuaf nnaben nak, ka na'bei' fa te, mimnau kau. Fin au on naan amsa', tua. Karu anmui' tuaf anfuri' atoin apirsait ein he nmo'en sanat, au umaeb ok, ma 'saek.

³⁰ Karu au he ufeef ate, reko nneis au ufeef a'matoom nok rasin re' naruru' ma nakrira' nak, au re' ia, a'oret. Batuur! ³¹ Hit Usi' Nai' Yesus, ma In Amaf, es re' Uisneno, nahinin nak, au ka u'uab fa rais poi. Naan natai, karu atoni' naikas, npures ma nboi's Ee piut-piut.

³² Tait i'tope' on re' unu' te, anbi kota Damsik, usif nai' Aretas in gubernur ee nreun tuaf fauk he npao kau 'bi kota in eno' 'tamas sin, he sin bisa nheek naan kau. ³³ Mes au partei ngguin nfaaf-boki' naan kau ma nataam kau nbi 'ki'u, rarit sin na'none' kau npaek tani na'ko kota naan in baah-rame mnanu' in kotin. Onaim au ufeitn ok u'ko gubernur ee in a'niman. Mes mimnau, fin karu au 'mees kuuk ate, ka bisa fa, tua.✠

12

Nai' Paulus ankius rais jes anbi mnitas

¹ Karu hi mroim, maut he au ufeef a'tein. Te kaah tafeef ate ka ma'osa' fa. Mes au 'roim he utoon 'eu ki rasin re' hit Usi' naruru' ma nakrira' nrair sin neu kau nbi mnitas. ²⁻⁴ Au uhiin tuaf es, re' anmafuit nok Kristus. Toon bo'es am haa akoont ii, anmui' tuaf re' nasaeb ee nbi neon goe tnanan re' mnaun re'uf. Mes au ka uhiin fa 'ak, in nsae neik in aon ee oo, ai' in asmaan ee es asaet. Suma Uisneno es ahinit. Au uhini msa' 'ak, oras in na'aiti' nsae neu Uisneno In Baer Reko naan, in nneen uab ein re' atmahun sin, tar antea mansian ii ka bisa na'uab fa saa'-saa'. ⁵ Onaim neu atoni' humaf on re' naan, au he ufeef. Mes au ka ufeef fa 'matoom nok au tuak ii. Mes anmatoom

✠ 11:33 Haef ein sin Reta' 9:23-25

nok rasi re' au ka bisa 'moe' je fa te, na' au ufeef on naan. ⁶ Karu au ufeef, au ka 'perluu fa he upoi, fin au 'mui' rasi mfaun re' batuur re' au bisa u'uab sin. Mes au 'tahan kuuk au tuak, he atoni' kais natenab nak, au reko 'neis u'ko saa' re' sin nneen ma nkius niit ee na'ko kau. ⁷ Anneis-neisi ntein, Uisneno naruru' ma nakrira' kau rasi mfaun re' ma'tani'.

Mes au upein susat amsa', maut he au kais ubeo'. Fin niut reu'f ein sin a'nakat anreek in ameput es he noik kau piut, on re' 'aika' napau au aok ii fani-fani. Airoo! Au 'suus batuur-batuur! ⁸ Anfain no teun goen, au 'toit he Uisneno nait inporin rasi ia na'ko kau. ⁹ Mes In nataah kau mnak, "Au ururu' ma ukrira' Au nekak arekot 'eu ko. Naan nanokab neu ko. Fin oras ho mukeo ma msadaar mak, natuin ho 'be'im kuum ka nanokab fa, anbi naan Au kuasa na'baab on piut." Es naan ate, au he ufeef a'tein, oras au ka 'moe' ubei' fa rais jes. Fin nok ranan naan, au uhiin 'ak, Kristus In kuasa nmoin et au nekak. ¹⁰ Es naan ate, karu au 'naben 'ak, au ka 'meup ubei' fa rais jes a'mees, au neek ii ntainina'. Onaim oras atoin ein ankana'paar kau, ai' nasusab kau, ai' anha'mui' kau, ai' natuin au 'jair Kristus Iin ja, au neek ii ntainina' nabaar aah. Fin karu au ka ubei' kuuk fa te, au upein kuasa u'ko Kristus he au ubei' rasi naan.

Nai' Paulus natenab anmatoom nok apirsait ein abitan Korintus

¹¹ Hi 'moinm ein nahuum on re' Uisneno ka nreek niit kau fa 'eit 'eu bare naan. Es naan ate, hi mromi ai' ka mroim fa msa', fe'le na au u'uab fare' kre'o. Amneon ii, hi ro he es re' mifeef anmatoom nok kau. Ro tebes, au ka ma'osa' fa. Mes karu hi mitaib kau mok "haef ein re' ma'tani' nneis" re' nak Uisneno nreek haefan sin, sin re' naan ka ma'tani' nneis fa na'ko kau.

¹² Ansuun oras Uisneno nreek haefan tuaf es he na-toon anmatoom nok Ne, tuaf naan anmoe' rais sanmakat huma'-huma' npaek kuasa he naruru' ma nakrira' bukti

mnak, Uisneno es re' anreek haefn ee. Mes kais amnikan, fin oras au 'bi hi sonam ma hi tnaanm ein, au 'moe' rais sanmakat amsa' on re' naan. Mes au 'meup on naan nok sabaar piut. ¹³ Mes kais mitoo', tua! Suma rasi mees' aah, re' au ka 'moe' je fa 'eu ki, re' tuaf'bian nmoe' je nbi jema'at bian. Rasi naan es re': au ka 'toit ki fa he hi misaah ma mitaah kau.

¹⁴ On nai! Au ubarab a'rair he 'uum 'eu ki no teun ii. Au ka 'perluu fa he hi misaah ma mitaah meik noni-roit meu au 'monik. Au ka 'perluu fa msa' hi 'mui'm ein. Fin, natuin hit harat, ka pantas fa he ri'laan ein natunu' 'mu'if neu sin mahoint ein. Re' pantas ji, mahoint ii es re' natunu' 'mu'if neu sin aanh ein. Onaim au ka 'perluu fa he hi mitunu' 'mu'if meu kau, fin hi on re' au aanh ein! Re' au 'perluu goe jaan, es re' hi tuam ein ma hi maneekm ein. ¹⁵ Au 'roim he 'soos bare' he 'fee ki. Au 'meup ma'tani' msa', maut he hi bisa mmoin mituin Uisneno In romin. Karu au 'neek 'iis ki, hi ro he mneek kau on naan amsa'. Onaim nansaa' am es hi mtahan hi rais manekat naan? Ka pantas fa, tua.

¹⁶ Anmui' tuaf na'ko ki re' anmanaku' mnak, au ka usaeb ki fa ma'fena'. Mes anmui' tuaf re' nak, au 'jair tua aputa-kriut ma'tani' ma upoi ki, tar antea 'moe' ki mituin au romik. ¹⁷ Onaim on mee? Of oni' tuaf ein re' au 'reek sin 'eu ki naan, napoi naan ki, oo? ¹⁸ Fin au 'furi' nai' Titus he neit nateef nok ki. Au 'reek haef amsa' na'ko hai aok-bian sin tuaf es antein, he neit nok ne. Of oni' nai' Titus napoi naan ki, oo? Kaah fa, tua. Fin nai' Titus nok kau re' ia, huma' mese'. Hai mmeup mepu re' huma' mese', fin hai nua kai teenb ii, huma' mese' msa'.

¹⁹ Aok-bian manekat arki! Of oni' hi mitenab mi'ko fe'e na mmak, hai mimneob hai tuam ein ambi hi humam ma hi matam? Kaah fa, tua! Fin are' saa' ii re' hai mi'uab sin re' ia, Uisneno nahiin anrair sin. Onaim hai ka bisa mi'koro' fa saa'-saa' mi'ko Na. Hai mmafuut mok Kristus

amsa'. Natuin hai mneek ki, es naan ate are' saa' re' hai mmoe' sin naan, nok sarit he hai bisa mmoe' ki he mi'bei'.

²⁰ Karu au 'jair he 'eit 'eu ki, au utenab, kais-kaisa' hi ka mjair fa tuaf on re' au romik. Fin kais-kaisa' anmui' tuaf re' anmatoe, re' neekn ee nameen, re' natunu' nekaf, re' natenab naan in tuan aa kuun, re' na'uab na're'uf es in kanan, re' na'uab re'uf neu es, re' abe'ot, ma re' nareu' are' saa' ii. Of oni' au 'jair tuaf re' hi ka mroim je fa msa'. ²¹ Karu au 'eit 'eu ki, au utiun gok natuin hi 'moe'm ein. Kais-kaisa' Uisneno he namae kau 'bi hi humam ma hi matam. Kais-kaisa' au 'moe' tuaf annaben ma'fena', natuin tuaf amfaun na'ko ki re' nmonin nbin 'moe' maufinu fe', mes ka mroim fa he mi'piis, he mibani' mfain mituin Uisneno In raan amneot ma ammonot. Sin nhai'niis jok! Fin anmui' tuaf re' anmakoin nok tuaf re' in ka fee ja fa, ai' in ka moen ja fa. Sin nmo'en huma'-huma' mes sin ka namaeb ok fa, tua.

13

Ampanat mirek-reko' hi 'monim

¹ Onaim re' ia, anfain no teun ii re' au he 'eit i'kius ki. Karu nmui' tuaf re' he nakuu tuaf es, kais amnikan in atoran. Fin Uisneno In Suur Akninu' matu'i mnak, "Karu nmui' tuaf re' nakuu tuaf es, ro he nmui' saksii nua'-teun re' na'uab huma' mese' fe'e te, na' amtoupu. Fin karu ka on fa naan ate, kais amtoupu."☆ ² Oras au 'eit 'eu ki 'fain no nuan ii, au umnaub tuaf ein re' nmonin nok 'moe' maufinu. Oras ia, au umnaub a'tein sin, nabu-bua nok mansian ii ok-oke' re' nmonin nbin 'moe' maufinu. On re' unu' te, au umnaub sin am 'ak, karu au 'jair he 'uum, au ka 'konan sin fa.

³ Hi maim bukti mmak, Kristus na'uab nanete npeo' kau. Karu Kristus he n'ator naan ki te, In n'ator nok kuasa ma'tani' nbi hi sonam ma hi tnaanm ein. Fin In ka n'oer

☆ 13:1 Surat re' Nareta' Nafani' Raan A'honis 17:6, 19:15

fa nbi mepu. ⁴ Oras sin na'maet Je nbi hau nehe, batuur In ka na'be'if, fin In nafetin anrair In kuasa. Mes Uisneno nfee nrair kuasa neu Kristus he In nmoin oras ia. Rarit maski hit re' tjair Iin na re' tnaben tak, hit ka ta'bei' fa, mes Uisneno nfee kit 'moin fe'u. Etun hai bisa mtuthae ki mpaek In kuasa.

⁵ Amparikas hi neekm ein kiim he hi mihiin am mak, hi mpirsai batuur meu Kristus, ai' kaah. In kuasa mamnita' et hi 'moinm ein, ai' kaah? Am'uji hi tuam ein on re' naan. Fin karu In ka nmafuuat fa nok ki te, hi ka mjair fa Iin na. ⁶ Karu hi mparikas kai, hi bisa mkius miit In kuasa mamnita' nbi hai 'moinm ein. Nok ranan naan, hai mipein fetin. ⁷ Hai m'onen amsa' meu Uisneno, maut he hi kais ammoe' sanat saa'-saa'. Hai ka mfairoir fa karu atoni' nroim, ai' ka nroim fa, nok hai 'moe'm ein. Mes hai mroim he hi mmoe' rasi re' amneot ma amnonot, maski tuaf bian he ntorak anporin kai. On naan amsa' ka saa'-saa' fa. ⁸ Fin hai ka bisa mmoe' fa saa'-saa' he mraban saa' re' namneo ma namnoon. Hai mmoe' mihini haa saa' re' namneo ma namnoon. ⁹ Karu hi mi'bei', ma hai m'oer, hai mmariin ahaa. Fin hai m'onen amtoit he Uisneno nanokab ki ntein. ¹⁰ Es naan ate, maski au u'roo u'ko ki, au 'tui rasin re' ia oras ia, maut he au 'eit ite, au kais u'uab ma'tani' 'eu ki 'tein. Au 'jair hit Usi' In haef. Mes In nfee kau hak ma kuasa he 'ha'tain ki, ma ka 'moe' ki fa he mimreu', tua.

Nai' Paulus nasoup in surat

¹¹ Aok-bian manekat arki! Au uab amsoput re' ia, es re' haan tabes ma haan buseet anbi manekat. Mimneob ma mimnonob are' kanan rasi. Amneen ma mitniin mirek-reko' au fainekat. Ammoin nekaf mese'. Hi ro he mmoin reko es nok es. Rais manekat na'uu ma na'baa' nbi Uisneno. Au 'toit he In nok ki piut, ma In nturun ma nbaab ki he hi bisa mmoin ammarama' es nok es.

¹² Hi ro he misee ma mmaneek panaf re' pantas neu Uisneno In tuaf akniun' ein. Uisneno Iin na re' abitan

ia sin arsin ansoun ein haan tabes ma haan buseet anbi manekat neu ki arki.

¹³⁻¹⁴ Au 'toit he hit Usi' Yesus Kristus naruru' ma nakrira' In nekan arekot neu ki. Au 'toit he Uisneno naruru' ma nakrira' In manekat neu ki. Au 'toti msa' he Uisneno In Asmaan Akniun' ee naruru' ma nakrira' neu ki In nekan amnanun, maut he hi arki mmoin nekaf mese' ma ansaof mese', tua.

On re' naan, tua.

Na'ko au, nai' Paulus kau, tua.

Uisneno In Kabin ma Prenat: Rais Manba'an Fe'u nok
Reta' Ahun-hunut

Genesis and the New Testament in the Amarasi language of
Indonesia

Kejadian dan Perjanjian Baru dalam bahasa Amarasi dari

copyright © 1999-2014 Unit Bahasa dan Budaya, Kupang NTT, Indonesia

Language: Amarasi

Translation by: Wycliffe Bible Translators

This translation is made available to you under the terms of the Creative Commons
Attribution-No Derivatives license 4.0.

You may share and redistribute this Bible translation or extracts from it in any format,
provided that:

You include the above copyright and source information.

You do not make any derivative works that change any of the actual words or
punctuation of the Scriptures.

Pictures included with Scriptures and other documents on this site are licensed just for
use with those Scriptures and documents. For other uses, please contact the respective
copyright owners.

2016-06-27

PDF generated using Haiola and XeLaTeX on 19 Jul 2019 from source files dated 20 Jul
2017

60603d94-9a14-5831-a729-e3ba7b0ebc25